

## Penilaian Impak Sosio-Ekonomi

Selain impak terhadap alam sekitar, pengurusan hutan turut menimbulkan kesan kepada masyarakat tempatan yang bergantung kepada sumber hutan dan mempunyai hak untuk mendapat manfaat daripada hutan secara adil dan lestari. Masyarakat Orang Asli serta penduduk setempat bergantung kepada hasil hutan bukan kayu seperti rotan, madu, herba dan tanaman ubatan. Ekopelancongan di Taman Negara Endau-Rompin serta Gunung Ledang pula menyumbang kepada pembangunan ekonomi negeri dan memberi peluang pekerjaan kepada masyarakat sekitar.

Penilaian impak sosial dilaksanakan bagi memastikan suara dan keperluan komuniti setempat diambil kira dalam pelaksanaan RPH. Kesedaran terhadap kualiti (*quality conscious*) juga sangat penting, khususnya dalam pelaksanaan aktiviti pemantauan dan mitigasi, supaya keputusan yang diperolehi adalah tepat, sahih, dan boleh dijadikan asas dalam membuat keputusan dasar.

Aspek penyertaan masyarakat dalam pengurusan hutan juga sangat dititikberatkan. Penyertaan komuniti tempatan dalam ekopelancongan, agroforestri, serta aktiviti pemulihan hutan akan meningkatkan rasa memiliki (*sense of ownership*) dan seterusnya memperkukuhkan keberkesanan pelaksanaan program. Akhir sekali, prinsip kelestarian (*sustainability*) menjadi tunjang utama, di mana keseimbangan antara keperluan ekonomi, ekologi dan sosial akan dijadikan asas dalam setiap strategi dan pelaksanaan RPH Johor agar pengurusan hutan dapat terus memberi manfaat secara berterusan dalam jangka panjang.

Prinsip kawal selia sendiri (*self-regulatory*), di mana pengusaha hutan, kontraktor, dan pihak industri berkaitan perlu mempunyai sistem pemantauan dalaman yang ketat untuk memastikan pematuhan tanpa bergantung sepenuhnya kepada penguatkuasaan luaran. Dalam masa yang sama, pengurusan hutan harus berpaksikan etika, dengan mengutamakan keadilan generasi, tidak mengeksploitasi sumber semata-mata demi keuntungan jangka pendek, serta memastikan sumber hutan dapat diwarisi generasi akan datang.

Penilaian impak sosial dilakukan melalui pendekatan konsultasi awam, temu bual berstruktur, soal selidik, dan bengkel bersama pihak berkepentingan. Antara dapatan isu utama yang diketengahkan termasuk akses masyarakat terhadap sumber hutan, peluang pekerjaan yang disediakan, kesan ekonomi akibat had pengeluaran, serta kebimbangan berkaitan kehilangan kawasan penting dari segi budaya atau sejarah.

Hasil daripada penilaian sosial ini, pihak pengurusan hutan dapat mengenal pasti potensi konflik dan seterusnya menyediakan mekanisme pengurusan aduan serta pelan komunikasi berkesan dengan masyarakat. Ia juga dapat memperkukuhkan hubungan antara pihak berkuasa hutan dan masyarakat, sekali gus memastikan kelangsungan pengurusan hutan dilaksanakan dengan sokongan komuniti setempat yang memberi manfaat jangka panjang dalam bentuk penyerapan karbon yang menyumbang kepada mitigasi perubahan iklim global. Pelaksanaan langkah konservasi juga berpotensi mengukuhkan biodiversiti negeri Johor dan mengangkat imej negeri sebagai peneraju dalam pengurusan hutan mampan serta meningkatkan kesejahteraan masyarakat di Malaysia.